

## OPĆINA ILIJAŠ

## Općinski načelnik

Na osnovu Budžeta općine Ilijaš za 2016. godinu, broj 01/1-02-3178-3/15 od 30.12.2015. godine, člana 29. Odluke o izvršavanju Budžeta općine Ilijaš za 2016. godinu, broj 01/1-02-3178-4/15 od 30.12.2015. godine ("Službene novine Kantona Sarajevo", broj 01/15) i člana 107. Statuta općine Ilijaš - Prečišćeni tekst ("Službene novine Kantona Sarajevo", broj 20/09), Općinski načelnik donosi

## ODLUKU

O ODOBRAVANJU IZDVAJANJA SREDSTAVA IZ  
TEKUĆE REZERVE BUDŽETA OPĆINE ILIJAŠ ZA  
2016. GODINU

## Član 1.

Odobravaju se finansijska sredstva iz tekuće budžetske rezerve u iznosu od 700,00 (sedam stotina i 00/100) KM BEŠLIJA NUSRETI iz Ilijaša - Mrakovo 22, na ime sufinansiranja troškova ukopa supruga Bešlija Amela, s obzirom na socijalni status porodice.

## Član 2.

Odobrena finansijska sredstva uplatiti na račun: BEŠLIJA NUSRETA, Vakufska banka dd Sarajevo - na broj 1601087200309972.

## Član 3.

Sredstva iz člana 1. ove Odluke obezbijedena su Budžetom općine Ilijaš za 2015. godinu, na poziciji "budžetska rezerva", a knjižit će se na teret budžetske stavke "Novčana pomoć nezaposlenim".

## Član 4.

Za realizaciju ove odluke zadužuje se Služba za privredu, finansije i investicije i Služba za boračko invalidsku zaštitu, socijalnu zaštitu i raseljena lica.

## Član 5.

Ova Odluka stupa na snagu danom donošenja, a objavit će se u "Službenim novinama Kantona Sarajevo".

Broj 03/2-35-326/16  
02. februara 2016. godine

Općinski načelnik  
Akif Fazlić, s. r.

## OPĆINA STARI GRAD SARAJEVO

## Općinsko vijeće

Na osnovu člana 29. Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije BiH", br. 39/03, 22/06 i 43/10) i člana 25. Statuta Općine Stari Grad Sarajevo - Prečišćeni tekst ("Službene novine Kantona Sarajevo", broj 20/13), Općinsko vijeće Stari Grad Sarajevo, na sjednici održanoj 28.01.2016. godine, donijelo je

## ODLUKU

O ORGANIZOVANJU I FUNKCIONISANJU ZAŠTITE I  
SPAŠAVANJA NA PODRUČJU OPĆINE STARI GRAD  
SARAJEVO

## I - ZAJEDNIČKE ODREDBE

## Član 1.

Odlukom o organizovanju i funkcionisanju zaštite i spašavanja na području Općine Stari Grad Sarajevo (u daljem tekstu Odluka) reguliše se način organizovanja, pripremanja i funkcionisanja civilne zaštite koja obuhvata: ličnu i uzajamnu zaštitu građana; mjere zaštite i spašavanja; štabove civilne zaštite; formiranje jedinica civilne zaštite.

Povjerenike civilne zaštite; službe zaštite i spašavanja; osmatranje i izviđanje i rukovođenje i upotrebu snaga i sredstava civilne zaštite.

## Član 2.

Organizovanje, pripremanje i funkcionisanje civilne zaštite na teritoriji Općine Stari Grad - Sarajevo (u daljem tekstu: Općina), temelji se na: Zakonu o zaštiti i spašavanju ljudi i materijalnih dobara od prirodnih i drugih nesreća i podzakonskim aktima donesenim na osnovu ovog Zakona, procjeni ugroženosti i povredljivosti teritorije Općine, te procjeni sopstvenih snaga i mogućnosti za zaštitu, spašavanje i otklanjanje posljedica od prirodnih i drugih nesreća, okvirnim ličnim i materijalnim formacijama službe, štabova, jedinica i povjerenika civilne zaštite.

## II - LIČNA I UZAJAMNA ZAŠTITA GRAĐANA

## Član 3.

Građani imaju pravo i dužnost učestvovati u civilnoj zaštiti, izvršiti obavezu davanja materijalnih sredstava i obučavati se za ličnu i uzajamnu zaštitu i za provođenje mjera zaštite i spasavanja. Građani imaju pravo i dužnost da u skladu sa Zakonom i planovima zaštite i spašavanja budu raspoređeni u štabove, službe zaštite i spašavanja, jedinice i povjerenike civilne zaštite, da daju podatke značajne za zaštitu i spašavanje koje saznaju ili primjete, i iste dostave najbližem Operativnom centru Službe civilne zaštite Općine Stari Grad Sarajevo, Policijskoj stanici ili Službi civilne zaštite.

## Član 4.

U zaštiti i spašavanju dužni su učestvovati radno sposobni građani od 18 do 60 godina života (muškarci), odnosno 18 do 55 godina (žene). Građanin koji je od nadležnog Štaba civilne zaštite pozvan radi učešća u zaštiti i spašavanju dužan je odazvati se pozivu na mjesto i u vrijeme određeno u pozivu.

U civilnoj zaštiti dobrovoljno mogu učestvovati svi muškarci i žene, stariji od 15 godina sa pravima i dužnostima pripadnika civilne zaštite.

## Član 5.

## a) Prava i dužnosti Općinskog vijeća

- donosi Odluku o organizovanju i funkcionisanju zaštite i spašavanja općine i osigurava njeno provođenje;
- donosi Program zaštite i spašavanja (općinski Program) na prijedlog Općinskog Načelnika;
- planira i utvrđuje izvore finansiranja za izvršavanje poslova zaštite i spašavanja iz nadležnosti općine;
- usvaja procjenu ugroženosti;
- osigurava potrebna finansijska sredstva u Budžetu Općine za finansiranje potreba u zaštiti i spašavanju iz nadležnosti Općine;
- organizira Operativni centar Službe civilne zaštite u Općini i osigurava njegovo funkcioniranje,

- vrši i druge poslove zaštite i spašavanja u skladu sa Zakonom i drugim propisima.

**b) Prava i dužnosti Općinskog Načelnika:**

- donosi Procjenu ugroženosti od prirodnih i drugih nesreća u Općini Stari Grad Sarajevo;
- predlaže Program zaštite i spašavanja (općinski Program);
- donosi Plan zaštite i spašavanja od prirodnih i drugih nesreća u Općini Stari Grad Sarajevo (općinski Plan);
- utvrđuje jedinstvenu metodologiju za procjenu šteta od prirodnih i drugih nesreća;
- razmatra stanje zaštite i spašavanja u Općini i donosi propise o organiziranju, pripremanju i djelovanju civilne zaštite u Općini.
- na prijedlog Općinskog štaba civilne zaštite proglašava nastanak prirodne i druge nesreće u Općini.
- proglašava stanje prirodne i druge nesreće i naređuje upotrebu snaga i sredstava civilne zaštite, službi za upravu, privrednih društava i drugih pravnih lica sa područja općine na prevenciji, ublažavanju i otklanjanju štetnih posljedica od prirodnih i drugih nesreća po ljude i materijalna dobra na području općine.
- donosi akte o osnivanju općinskog Štaba civilne zaštite, postavljanju komandanta i Načelnika Štaba civilne zaštite i određivanju funkcija u općinskim službama za upravu, čiji su nosioci po položaju članovi Općinskog štaba civilne zaštite.

**c) Prava i dužnosti Općinskih službi za upravu:**

- Sve općinske službe za upravu organizuju, planiraju i osiguravaju provođenje preventivnih mjera za zaštitu vlastitog ljudstva, materijalnih sredstava i objekata koje koriste u svom radu.
- Učestvuju u izradi Procjene ugroženosti za teritoriju Općine Stari Grad, općinskog Programa i općinskog Plana u pitanjima iz oblasti za koju su osnovani i u okviru svoje redovne djelatnosti realizuju zadatke koje se za njihove oblasti utvrde u tim dokumentima.
- Provodi mjere zaštite i spašavanja ljudi i materijalnih dobara iz svoje oblasti a naročito mjere koje zapovjedi Općinski štaba CZ koje se odnose na angažiranje službi zaštite i spašavanja, privrednih društava i drugih pravnih lica u zaštiti i spašavanju.
- Obavještava Službu CZ o podacima koji su od značaja za planiranje, organiziranje i provođenje zaštite i spašavanja ljudi i materijalnih dobara iz nadležnosti Općine.
- Učestvuje u izradi Elaborata za izvođenje zajedničkih i samostalnih vježbi zaštite i spašavanja.

**d) Služba civilne zaštite u oblasti zaštite i spašavanja obavlja slijedeće poslove:**

- organizira, priprema i provodi zaštitu i spašavanje na području općine;
- izrađuje procjenu ugroženosti za područje općine;
- priprema program razvoja zaštite i spašavanja od prirodnih i drugih nesreća u općini;
- predlaže plan zaštite i spašavanja od prirodnih i drugih nesreća u općini;
- prati stanje priprema za zaštitu i spašavanje i predlaže mjere za unapređenje organiziranja i osposobljavanja civilne zaštite;
- organizira, izvodi i prati realizaciju obuke građana na provođenju lične i uzajamne zaštite;

- organizira i koordinira provođenje mjera zaštite i spašavanja, te organizuje i provodi poslove zaštite od požara i vatrogastvo predlaže program samostalnih vježbi i izrađuje elaborat za izvođenje vježbi civilne zaštite u općini;
- organizuje općinski operativni centar civilne zaštite i obezbjeđuje njegov rad;
- vrši popunu ljudstvom štabova civilne zaštite, službi zaštite i spašavanja i jedinica civilne zaštite u skladu sa zakonom i podzakonskim propisima, određuje povjerenike civilne zaštite i osigurava njihovo opremanje materijalno-tehničkim sredstvima, te organizira, izvodi i prati realizaciju njihove obuke;
- priprema propise u oblasti zaštite i spašavanja iz nadležnosti općine;
- vodi propisane evidencije i vrši druge poslove zaštite i spašavanja u skladu sa zakonom i drugim propisima i općim aktima

**e) Prava i dužnosti mjesnih zajednica:**

Mjesna zajednica u okviru svojih prava i dužnosti u organizovanju i ostvarivanju zaštite i spašavanja od prirodnih i drugih nesreća naročito:

- organizuje i osposobljava građane za sprovođenje zadataka i mjera zaštite;
- planira i organizuje mjere zaštite;
- formira štabove civilne zaštite;
- na principu dobrovoljnosti planira, organizuje radne jedinice od svih građana i provodi njihovu mobilizaciju radi učešća u zaštiti;
- organizuje i obezbjeđuje prihvati i zbrinjavanje evakuisanih građana i materijalnih dobara;
- organizuje i održava red za vrijeme prirodne i druge nesreće;
- obezbjeđuje informisanje građana o opasnostima od prirodnih i drugih nesreća, posljedicama i mjerama koje se preduzimaju na zaštiti i otklanjanju posljedica.

U organizovanju, planiranju i ostvarivanju zaštite i spašavanja mjesna zajednica saraduje sa Štabom civilne zaštite mjesnog područja i preduzećima na području mjesne zajednice u pitanjima od zajedničkog interesa i u tom pogledu mogu udruživati snage i sredstva za zaštitu od prirodnih i drugih nesreća na području mjesne zajednice.

Mjesna zajednica u Statutu ili drugom općem aktu uređuje način organizovanja i ostvarivanja zaštite od prirodnih i drugih nesreća na području mjesne zajednice, utvrđuje nadležnost organa mjesne zajednice, kao i način angažovanja građana u zaštiti i spašavanju.

**III - ORGANIZACIJA MJERA ZAŠTITE SPAŠAVANJA**

**Član 6.**

U zaštiti i spašavanju ljudi i materijalnih dobara od opasnosti i posljedica prirodnih i drugih nesreća provode se slijedeće aktivnosti i mjere:

1. Sklanjanje ljudi i materijalnih dobara;
2. Evakuacija;
3. Zbrinjavanje ugroženih i nastradalih;
4. Zamračivanje;
5. Zaštita i spašavanje od radioloških, hemijskih i bioloških sredstava;
6. Zaštita i spašavanje od rušenja;
7. Zaštita i spašavanje od požara;
8. Zaštita od neeksplozivnih ubojnih sredstava;

9. Prva medicinska pomoć;
10. Zaštita i spašavanje životinja i namirnica životinjskog porijekla;
11. Asanacija terena;
12. Zaštita okoliša.

### 1) Sklanjanje ljudi i materijalnih dobara

#### Član 7.

Sklanjanje ljudi i materijalnih dobara je mjera civilne zaštite koja obuhvata planiranje i izgradnju skloništa, drugih zasebnih objekata kao i zaklona pogodnih za zaštitu i sklanjanje, njihovo održavanje i organizovanje korištenja od zračnih opasnosti, raketnih, topovskih i drugih napada od upotrebe radioloških, hemijskih i bioloških sredstava i od opasnosti velikih tehnoloških nesreća.

#### Član 8.

Za sklanjanje stanovništva koristit će se skloništa osnovne zaštite (kućna, blokovska i javna), a u nedostatku istih, sklanjanje će se planirati putem izgradnje skloništa dopunske zaštite (adaptacija podrumskih prostorija).

### 2) Evakuacija

#### Član 9.

Evakuacija predstavlja plansko organizirano i privremeno premještanje stanovništva i materijalnih dobara iz područja za koja se procjenjuje da mogu biti zahvaćena prirodnim i drugim nesrećama na neugrožena ili manje ugrožena područja susjedne ili druge općine pod uvjetom da drugim mjerama zaštite i spašavanje nije moguće zaštititi ljude i materijalna dobra.

#### Član 10.

Provođenje evakuacije vrši Štab civilne zaštite Općine i Štab civilne zaštite one Općine koji vrši prihvatanje evakuiranog stanovništva. Pored Štaba civilne zaštite u izvršavanju evakuacije učestvuju i službe za upravu Općine nadležne za prostorno planiranje i urbanizam, zdravstvo i socijalnu zaštitu, stambeno komunalne poslove, obrazovanje i druge službe. U provođenju evakuacije ostvaruje se saradnja i sa policijom, humanitarnim organizacijama i privrednim društvima koja mogu pomoći u efikasnom izvršavanju evakuacije.

Po Planu zaštite i spašavanja Općina Stari Grad, ne vrši evakuaciju, samo u slučaju naredbi drugih viših organa (Vlada Federacije BiH).

### 3) Zbrinjavanje ugroženog i nastradalog stanovništva

#### Član 11.

Zbrinjavanje ugroženog i nastradalog stanovništva od prirodnih i drugih nesreća podrazumijeva hitne aktivnosti i mjere za smještaj, ishranu i osiguranje drugih prijeko potrebnih uvjeta za život ugroženih, stradalih, prognanih i izbjeglih lica.

#### Član 12.

Troškovi zbrinjavanja ugroženih, stradalih, prognanih i izbjeglih lica podmiruju se iz budžeta Općine, Kantona i Federacije i sredstava solidarne i humanitarne pomoći, donacija i drugih izvora u zavisnosti od prirode i obima nesreće.

#### Član 13.

Vlasnici i korisnici objekata i prostorija u javnim ustanovama (škole, domovi, hoteli i drugo), koji su pogodni za smještaj, dužni su primiti na privremeni smještaj građane i materijalna dobra sa ugroženih područja, ako to naredi Štab civilne zaštite.

### 4) Zamračivanje

#### Član 14.

Zamračivanje je mjera koja se priprema i planira u miru, a sprovodi u periodu neposredne ratne opasnosti i za vrijeme trajanja opšte opasnosti u ratu. Zamračivanje može biti potpuno i djelimično.

### 5) Zaštita i spašavanje od radioloških, hemijskih i bioloških sredstava

#### Član 15.

Zaštita i spašavanje od radioloških, hemijskih i bioloških sredstava će se planirati u okviru planova civilne zaštite svih subjekata koji donose vlastite planove organizovanja i djelovanja u ratu. Za sprovođenje RHB zaštite formiraju se specijalizovane jedinice civilne zaštite na nivou Federacije, Kantona i Općine.

### 6) Zaštita i spašavanje od rušenja

#### Član 16.

Zaštita i spašavanje od rušenja obavezno se planira i provodi kao preventivna mjera, u postupku donošenja i ostvarivanja prostornih i urbanističkih planova i na način što se predviđaju građevinsko tehničke i druge potrebne mjere u izgradnji objekata kojima se može uticati na sprečavanje, odnosno smanjenje štetnih uticaja prirodnih i drugih nesreća i nemogućnosti rušenja.

U fazi spašavanja i otklanjanja posljedica od rušenja koje može nastati usljed zemljotresa, odrona, klizanja tla i bujičnih voda, angažuje se organizovane snage zaštite i spašavanja na Općini.

#### Član 17.

Zaštitu i spašavanje iz ruševina provode:

- građani u okviru samozaštite;
- građevinska, komunalna, transportna, i druga društva, vatrogasne jedinice kao i druga pravna lica koja raspolažu odgovarajućim MTS-om, opremom, znanjem i radnom snagom;
- specijalizovane jedinice civilne zaštite FUCZ i KUCZ kao i jedinice radne obaveze i gorske službe spašavanja;
- Služba za zaštitu i spašavanje od rušenja koju formira Općina (Načelnik);
- nadležni općinski organi kao i drugi učesnici zaštite i spašavanja koji se angažuju u skladu sa planom zaštite i spašavanja.

### 7) Zaštita i spašavanje od požara

#### Član 18.

Zaštita i spašavanje od požara obuhvata: pripremu i provođenje preventivnih mjera u svim sredinama, objektima, mjestima i prostorima gdje postoji mogućnost nastanka požara; organiziranje i pripremanje snaga za gašenje požara; organiziranje osmatranja i uzbunjivanja o pojavama požara, gašenje i lokalizovanje požara i spašavanje ljudi i materijalnih dobara iz objekata i područja ugroženih požarom.

#### Član 19.

Za provođenje mjera zaštite od požara Općina (Načelnik) će svojim aktom odrediti pravno lice, odnosno Udruženje građana da formira službu zaštite od požara.

Profesionalne i dobrovoljne vatrogasne jedinice kao i drugi oblici vatrogasnog organizovanja dužni su planirati, pripremati i provoditi zaštitu od požara i djelovati u skladu sa propisima zaštite od požara i vatrogastva.

## 8) Zaštita od neeksplozivnih ubojnih sredstava

### Član 20.

Zaštita od neeksplozivnih ubojnih sredstava je mjera koja se sastoji u pronalaženju, otkrivanju, obilježavanju, prenošenju, utovaru, istovaru, privremenom skladištenju i uništavanju neeksplozivnih ubojnih sredstava. Građani i druga lica dužni su o otkrivenim neeksplozivnim ubojnim sredstvima odmah obavjestiti nadležni centar za osmatranje i uzbunjivanje, najbližu Policijsku upravu ili Službu civilne zaštite Općine.

Za provođenje ove mjere formira se specijalizovana jedinica za zaštitu od NUS-a (MAC) na nivou države BiH, koja ovu mjeru provodi u saradnji sa FUCZ, KUCZ i Općinskim štabom civilne zaštite.

## 9) Prva medicinska pomoć

### Član 21.

Prva medicinska pomoć je mjera zaštite i spašavanja koja obuhvata preventivnu zaštitu koju čine protiv epidemijske i higijenske mjere zaštite stanovništva, operativne zaštite koja se sastoji od pružanja prve pomoći, medicinske trijaže povrijeđenih, oboljelih i ranjenih lica, sanitetske evakuacije i transporta do najbliže zdravstvene ustanove radi potpunog zdravstvenog zbrinjavanja.

Prvu medicinsku pomoć organizuju i neposredno provode nadležne zdravstvene ustanove u suradnji sa Štabom civilne zaštite.

Za provođenje ove mjere Općina (Načelnik) će svojim aktom odrediti pravno lice iz oblasti zdravstva sa područja Općine da formira Službu za medicinsku pomoć.

## 10) Zaštita i spašavanje životinja i namirnica životinjskog porijekla

### Član 22.

Zaštita i spašavanje životinja i namirnica životinjskog porijekla podrazumjeva zbrinjavanje ugroženih, stradalih, oboljelih i otrovanih životinja, kao i zaštitu namirnica životinjskog porijekla. Organizaciju spašavanja sprovode nadležne općinske službe za upravu i veterinarske stanice u suradnji sa Štabom civilne zaštite.

## 11) Asanacija terena

### Član 23.

Asanacija terena je mjera koja se sastoji od poduzimanja sanitarno-higijenskih i sanitarno-tehničkih mjera na terenu, u cilju sprečavanja širenja zaraze, epidemije i drugih štetnih posljedica po ljude i materijalna dobra, a obuhvata sklanjanje, identifikaciju i pokop poginulih, uklanjanje leševa životinja, dezinfekciju, dezinsekciju i deratizaciju objekata i terena i štetnih stvari koji ugrožavaju zdravlje i život ljudi i okoliša.

Asanaciju terena će provoditi nadležne zdravstvene ustanove, općinske službe za zaštitu i spašavanje, koje su aktom Općine (Načelnika) određene za vršenje poslova ZIS, te nadležne specijalizovane jedinice FUCZ i KUCZ u suradnji sa Općinskim štabom civilne zaštite.

## 12) Zaštita okoliša

### Član 24.

Zaštita okoliša je mjera koja se sastoji u sprečavanju nastanka štetnih posljedica od uništavanja i zagađivanja okoliša i otklanjanju posljedica nastalih usljed:

- tehničko-tehnoloških havarija u industriji posebno hemijskoj, farmaceutskoj i petrohemijskoj, kao i drugih

nesreća i katastrofa čije posljedice mogu ugroziti okoliš, a naročito prirodne resurse;

- ispuštanja toksičnih i štetnih hemijskih i drugih materija u okoliš iz industrijskih i termoenergetskih postrojenja, motornih vozila i individualnih ložišta u domaćinstvima u količinama koje uzrokuju emisione koncentracije u vodi, zraku i tlu iznad maksimalno dozvoljenih vrijednosti;
- odlaganja komunalnog, industrijsko-tehnološkog i drugog čvrstog i tečnog otpada;
- djelovanja vremenskih nepogoda na okolicu (snježne padavine, poplave, suše, klizišta), kao i drugih prirodnih nepogoda.

Mjere će sprovođiti:

- građani u okviru lične i uzajamne zaštite;
- pravna lica koja se bave djelatnošću koja može raditi ovu vrstu nesreće;
- Službe zaštite i spašavanja koje formira Općina (Načelnik) svojim aktom.

## IV - ŠTABOVI CIVILNE ZAŠTITE

### Član 25.

Za rukovođenje akcijama zaštite i spašavanja na teritoriji Općine i za obavljanje drugih poslova u zaštiti i spašavanju, u skladu sa Zakonom i drugim propisima osniva se Štab civilne zaštite kao operativno-stručni organ. Štab civilne zaštite funkcioniše u miru, samo onda, kada nadležni organ proglasi da je nastalo stanje prirodne i druge nesreće na određenom području, odnosno kada treba preventivno djelovati prije nastanka prirodne i druge nesreće, kao i za vrijeme vježbi civilne zaštite, a u ratu funkcioniše stalno.

### Član 26.

Štabovi civilne zaštite mogu se osnivati u pravnim licima u skladu sa njihovim procjenama ugroženosti.

### Član 27.

U rukovođenju akcijama zaštite i spašavanja štabovi civilne zaštite vrše slijedeće poslove:

1. Odlučuju o upotrebi snaga i sredstava civilne zaštite na zaštiti i spašavanju ugroženih i stradalih ljudi i materijalnih dobara i te snage raspoređuju na područja koja su ugrožena;
2. Naređuju provođenje odgovarajućih mjera zaštite i spašavanja i određuju snage i sredstva koje će provoditi te mjere;
3. Usmjeravaju, koordiniraju i rukovode akcijama zaštite i spašavanja svih učesnika angažovanih na zaštiti i spašavanju;
4. Rješavaju sva pitanja koja su u toku provođenja aktivnosti na zaštiti i spašavanju pojave u vezi sa angažovanjem snaga i sredstava civilne zaštite i provođenju mjera zaštite i spašavanja i samozaštite građana.

### Član 28.

Rukovođenje akcijama zaštite i spašavanja u organima uprave i drugim tijelima vlasti i pravnim licima vrše i to:

1. U organima uprave i drugim organima vlasti - rukovodilac organa uprave;
2. U pravnom licu - Štab civilne zaštite, ako je osnovan, odnosno direktor;
3. U mjesnoj zajednici - Štab civilne zaštite, a ako Štab nije osnovan, povjerenik civilne zaštite.



Član 29.

Općinski štab civilne zaštite sastoji se od: komandanta, načelnika i članova štaba.

Član 30.

U uvjetima kada prirodna i druga nesreća zaprijeti ili nastane iznenada, a komandant nadležnog Štaba civilne zaštite nije u mogućnosti izvršavati svoje dužnosti, načelnik Štaba civilne zaštite ovlaštenje da u ime komandanta poduzima sve potrebne mjere značajne za zaštitu i spašavanje, dok komandant ne počne vršiti svoju funkciju.

Član 31.

Sastav i način popune štabova civilne zaštite uređuje se posebnim općim aktom organa uprave (rješenjem, Općinskog Načelnika), odnosno posebnim aktom pravnog lica.

Član 32.

Aktom o unutrašnjoj organizaciji i sistematizaciji Općinskog štaba civilne zaštite koji je sastavni dio Plana zaštite i spašavanja Općine od prirodnih i drugih nesreća detaljnije su opisana mjesta u Štabu.

V - POVJERENICI CIVILNE ZAŠTITE

Član 33.

Povjerenici civilne zaštite određuju se u naselju, dijelu naselja stambenim zgradama, organima uprave i službama za upravu Općine, drugim organima i ustanovama i pravnim licima u kojim se ne osniva Štab civilne zaštite.

U organima uprave i drugim organima i ustanovama i službama za upravu, određuje se jedan povjerenik za svaki organ, odnosno svaku ustanovu.

Član 34.

Povjerenici u organima uprave i drugim organima vlasti, ustanovama i pravnim licima vrše poslove koji se odnose na organizovanje i pripremanje mjera i aktivnosti na sudjelovanju službenika i zaposlenika na provođenju lične i kolektivne zaštite i mjera zaštite i spašavanja u zgradama i objektima za koje su zaduženi.

Član 35.

Planom zaštite i spašavanja od prirodnih i drugih nesreća vrši se određivanje broja povjerenika civilne zaštite, razrada njihovih poslova i zadataka u miru, za vrijeme prirodnih nepogoda i drugih nesreća.

Povjerenici civilne zaštite u mjesnim zajednicama gdje nije formiran Štab, su sekretari mjesnih zajednica.

VI - SLUŽBA ZAŠTITE I SPAŠAVANJA

Član 36.

Službe zaštite i spašavanja po pravilu organizuju se u privrednim društvima i drugim pravnim licima koja obavljaju djelatnost iz oblasti: zdravstva, veterinarstva, stambenih i komunalnih poslova, vodoprivrede, šumarstva, poljoprivrede, građevinarstva, transporta, opskrbe, ugostiteljstva, vatrogastva, hidrometeorologije, seizmologije, ekologije i drugih oblasti u kojima se obavljaju djelatnosti od značaja za zaštitu i spašavanje ljudi i materijalnih dobara.

Član 37.

Službe zaštite i spašavanja vrše poslove zaštite i spašavanja po pitanjima koja proizilaze iz osnovne djelatnosti pravnog lica. Te poslove služba ostvaruje provođenjem preventivnih i operativnih mjera zaštite i spašavanja.

Član 38.

Općinski načelnik, na prijedlog Službe civilne zaštite određuje pravna lica i udruženja građana u kojima će se organizovati služba zaštite i spašavanja i sa istim će potpisati Ugovor/Sporazum o međusobnim pravima i obavezama.

VII - OPERATIVNI CENTAR CIVILNE ZAŠTITE

Član 39.

U sastavu Službe civilne zaštite Općine Stari Grad, formiran je Operativni centar.

Radi stalnog prikupljanja podataka o svim vrstama pojava i opasnosti koje mogu dovesti do prirodne ili druge nesreće, kao i podataka o posljedicama koje su nastale pojavom prirodne ili druge nesreće po ljude i materijalna dobra na ugroženom području, obradu tih podataka o posljedicama koje su nastale pojavom prirodne ili druge nesreće po ljude i materijalna dobra na ugroženom području, obradu tih podataka i njihove distribucije nadležnim organima vlasti i pravnim licima, kao i prenošenje naredbi štaba civilne zaštite u vrijeme funkcionisanja tih štabova formiraju se operativni centri civilne zaštite.

Član 40.

Općinski operativni centar radi prema potrebi, a najmanje osam sati svaki radni dan.

U slučaju proglašenja stanja prirodne ili druge nesreće Operativni centar će raditi neprekidno 24 sata, s tim da će se iz reda uposlenika Općine rasporediti još tri izvršioca za rad u Operativnom centru.

Član 41.

Davaoci informacija, građani i udruženja građana, dužni su Operativnom centru dostavljati sve podatke i informacije, koji se odnose na pojave i opasnosti koje mogu dovesti do nastanka prirodne ili druge nesreće, odnosno na posljedice koje su nastale djelovanjem sljedećih prirodnih i drugih nesreća, i to: potresa; poplava; požara; klizanja tla i snježnih lavina i nanosa; nagomilavanja leda na vodotocima i komunikacijama; udara groma, jakih vjetrova, guste magle, jakih mrazeva velikih vrućina i suša; saobraćajnih udesa u željezničkom, cestovnom, riječnom i zračnom saobraćaju; eksplozija, rušenja i drugih nesreća u rudnicima; ispuštanja ili prosipanja štetnih i otrovnih materija; zagađenosti riječnih tokova, zemljišta i okoliša; rušenja ili prelijevanja brana na hidroakumulacijama; havarija i većih kvarova u industrijskim postrojenjima; zaraznih bolesti kod ljudi (epidemije); zaraznih bolesti kod životinja (epizootije); zaraznih bolesti kod bilja (epifitije); radijacijsko-hemijsko-biološke kontaminacije; trovanja ljudi hranom ili vodom; oštećenjima električne ili vodovodne mreže, nafto voda, plinovoda, telekomunikacija ili saobraćajne mreže, pronalazjenja minsko-eksplozivnih sredstava i neeksplozivnih ubojnih sredstava (NUS) i drugih pojava i opasnosti koje svojim djelovanjem mogu ugroziti život i zdravlje ljudi i uništiti materijalna dobra.

Podaci iz stava 1. ovog člana, operativnom centru dostavljaju se odmah čim se primjeti ili sazna za opasnost koja može dovesti do nastanka prirodne ili nesreće, a kada nastane prirodna ili druga nesreća, dostavljaju se podaci o nastalim posljedicama po život i zdravlje ljudi i mjerama i aktivnostima koje se sprovode na spašavanju ljudi i materijalnih dobara na ugroženim područjima.

Član 42.

Sa općinskim Operativnim centrom službe civilne zaštite povezuju se sljedeći organi i pravna lica:

- Operativni centar policijske uprave Stari Grad Sarajevo
- Kantonalna uprava civilne zaštite - Profesionalna vatrogasna jedinica (PVJ) i DVD "Vratnik";

- Hitna pomoć i DZ "Stari Grad Sarajevo sa ambulantom po mjesnim zajednicama;
- Radio i TV "Hayat" i KTV Sarajevo;
- pravna lica i udruženja građana koja su proglašena za službe zaštite i spašavanja općine;
- radio-amateri i druga udruženja građana, imaoi radio-uredaja registrovanih kod nadležnih organa.

VIII - RUKOVOĐENJE I UPOTREBU SNAGA I SREDSTAVA CIVILNE ZAŠTITE

Član 43.

Kada nadležni organ proglasi da je na određenom području nastala prirodna ili druga nesreća, aktiviraju se štabovi civilne zaštite na tom području radi rukovođenja akcijama zaštite i spašavanja. Štabovi civilne zaštite mogu se aktivirati i u slučaju kada prijeti neposredna opasnost od nastanka prirodne i druge nesreće.

Član 44.

Angažovanje i upotrebu snaga civilne zaštite u akcijama zaštite i spašavanja vrše štabovi civilne zaštite na osnovu prethodno izvršene procjene o vrsti prirodne i druge nesreće, područja na kom djeluje ta nesreća i obimu i vrsti mogućih posljedica po ljude i materijalna dobra na ugroženom području.

Član 45.

Jedinice civilne zaštite upotrebljavaju se u skladu sa planovima zaštite i spašavanja, prvenstveno na zadacima zaštite ljudi i materijalnih dobara. Upotreba snaga traje do momenta kada je završeno spašavanje ugroženih i stradalih ljudi i materijalnih dobara. U toku vršenja postupka iz svoje nadležnosti, komandovanje jedinicama civilne zaštite vrše komandiri tih jedinica.

Član 46.

Lica raspoređena u jedinice civilne zaštite, dužna su da izvršavaju naređenja komandanta, odnosno komandira jedinica civilne zaštite u koju su raspoređena, a jedinice civilne zaštite dužne su da izvršavaju naređenja nadležnog Štaba civilne zaštite. Niko nije dužan i ne smije da izvrši naređenja, ako je očito da bi time izvršio krivično djelo ili kršio međunarodno humanitarno pravo.

Član 47.

Obveznike civilne zaštite na dužnost u civilnoj zaštiti, raspoređuju nadležni organi u skladu sa propisom Vlade Federacije.

Član 48.

Štabovi, službe zaštite i spašavanja, jedinice i povjerenici civilne zaštite, opremaju se odgovarajućom opremom i materijalno-tehničkim sredstvima koja su neophodna za njihovu ličnu zaštitu i za izvršavanje zadataka civilne zaštite iz njegove nadležnosti.

Vrsta i količina sredstava utvrđuje se materijalnim formacijama koje utvrđuje organ koji ih organizira u skladu sa okvirnom ličnom i materijalnom formacijom štabova, službi i jedinica. Prilikom izvršavanja zadataka civilne zaštite, pripadnici nose odjeću civilne zaštite na kojoj je na vidnom mjestu istaknut znak civilne zaštite.

X - PRELAZNE I ZAVRŠNE ODREDBE

Član 49.

Stupanjem na snagu Odluke o organizovanju i funkcionisanju zaštite i spašavanja na području Općine Stari Grad - Sarajevo prestaje da važi dosadašnja Odluka o organizovanju i funkcionisanju zaštite i spašavanja na području Općine Stari

Grad Sarajevo ("Službene novine Kantona Sarajevo", broj 24/03 i 5/09).

Član 50.

Ova Odluka stupa na snagu osmog dana od dana objavljivanja u "Službenim novinama Kantona Sarajevo".

Broj 02-49-27/16  
28. januara 2016. godine  
Sarajevo

Predsjedavajući  
Općinskog vijeća  
Stari Grad Sarajevo  
**Vedran Dodik, s. r.**

Na osnovu člana 25. Statuta Općine Stari Grad Sarajevo - Prečišćeni tekst ("Službene novine Kantona Sarajevo", broj 20/13) i člana 17. stav 1. Odluke o prodaji poslovnih prostora zakupcima ("Službene novine Kantona Sarajevo", broj 50/15), Općinsko Vijeće Stari Grad Sarajevo, na sjednici održanoj 28. januara 2016. godine, donijelo je

**ODLUKU**

**O REALIZACIJI KAPITALNOG PROJEKTA OPĆINE STARI GRAD SARAJEVO IZ SREDSTAVA OSTVARENH PRODAJOM POSLOVNIH PROSTORA**

Član 1.

Ovom Odlukom odobrava se realizacija kapitalnog projekta iz sredstava ostvarenih prodajom poslovnih prostora evidentiranim na posebnom namjenskom računu Općine Stari Grad Sarajevo u sklopu JRT općine.

Navedena namjenska sredstva će naknadno, po izradi završnog računa općine za 2015. godinu biti uključena u budžet općine za 2016. godinu i raspoređena na projekat čiji će odabir izvršiti Općinsko Vijeće ovom Odlukom.

Član 2.

Kapitalni projekat koji će se realizovati iz sredstava ostvarenih prodajom poslovnih prostora je:

- Izgradnja podzemne garaže na lokalitetu ulice Avdage Šahinagića

Član 3.

Ostvarena namjenska sredstva iz člana 1. ove Odluke biće naknadno iskazana u budžetu Općine Stari Grad Sarajevo za 2016. godinu na poziciji 821000 - kapitalni izdaci.

Član 4.

Ova Odluka stupa na snagu danom donošenja a biće naknadno objavljena u "Službenim novinama Kantona Sarajevo".

Broj 02-49-33/16  
28. januara 2016. godine  
Sarajevo

Predsjedavajući  
Općinskog vijeća  
Stari Grad Sarajevo  
**Vedran Dodik, s. r.**

Na osnovu člana 7. stav 3. i 13.a stav 1. Zakona o investiranju javnih sredstava ("Službene novine Federacije BiH", broj 77/04 i 48/08) člana 10. i 25. Statuta Općine Stari Grad Sarajevo - Prečišćeni tekst ("Službene novine Kantona Sarajevo", broj 20/13) i člana 2. Pravilnika o investiranju javnih sredstava Općine Stari Grad Sarajevo ("Službene novine Kantona Sarajevo", broj 37/13), Općinsko Vijeće Stari Grad Sarajevo, na sjednici održanoj dana 28. januara 2016. godine, donijelo je